



長頸鴨

在一個農場，好多群鵝仔同鴨仔在裡背走上走下，有兜仔在中央个魚塘泅等水。

農場个籬笆脣，鹽酸樹下鴨嫲孵等一寶卵。隔無幾遠个蒜果樹下，鵝嫲也孵等卵。這兩寶鴨嫲同鵝嫲，三不時就頸根擱長同對方「哇」一聲。哇過後就頭磬磬仔掌等寶，繼續孵卵。

一段日仔過後，鵝嫲頸根擱長、蹣等翼離開厥寶，後背蹣等一、二、三、……，一共六隻細鵝子。其中有一隻一身黃黃，無像其他个有間等一息灰色。行經過鴨寶該下，鵝嫲看等該隻歸身黃个鵝子，心肚緊愰，毋知會自家無注意去孵著鴨卵無？佢恁仔愰該下，就對鴨嫲「哇」一聲，蹣等就同該隻細子仔撻去鴨寶脣口。

鴨嫲看著該隻細子，就像自家進前孵出个細子共樣色身，佢無愰忒多就同佢坏入寶裡背。再過地一兩日，鴨嫲个寶孵出幾下隻細鴨子。這兜鴨子歸身都係黃毛，這下該鵝子同鴨子看起來共樣。鴨嫲帶等歸寶細子仔，在農場行上行下，又去魚塘搞水。毋管佢等行路，也係在魚塘肚泅水，該兜鴨子看等該鵝子，大家都問鴨嫲：「阿姆，厥頸根仰會特別長？」

鴨嫲聽著，就拐佢等講：「該係因為佢最頭先孵出來，故所頸根會過長。」下後因為厥頸根比別人个過長，大家人就安佢「長頸鴨」。

時間過地幾下隻月，原來个細鴨子早就變大鴨地。原來个黃毛，也換做一身雪白个毛色。長頸鴨个頸根又生做過長地，佢一身雪白个毛，閉開翼个時節，在日頭下看起來就像一個公主樣仔恁高貴。在魚塘項泅水該下，佢在映等日華个水紋肚，看起來就像一個仙女下凡，十分錫人看。佢仰仔看自家个身影都無像其他个兄弟姊妹，顛倒像農場裡背个土鵝。

有一日鴨嫲同佢講，佢確實就係土鵝。該下就係因爭厥毛色同土鵝無共樣，故所鵝嫲覺著佢係鴨仔，就同佢撻去鴨寶。雖然長頸鴨尾下知自家係鵝仔，毋過佢從細就蹣等鴨仔共下生活，早就認同該兜鴨仔係一家人地。每日，佢等共下搞寮，走相逐。

有一擺，對籬笆外背趕來一尾蛇哥，長頸鴨先看著，就大嫲聲啞啞喊喊。蹣等佢就同翼閉開來，想愛啄該尾蛇哥。有佢警告同保護，大家正無分蛇哥个嚇著。又有一擺，佢等在鹽酸樹下寮，其他个鴨仔看著樹頂个鹽酸子，想愛食，毋過頸根忒短吮毋著食。長頸鴨就同頸根擱長啊，同過高个果子掙下來分大家享受。

雖然同大家人暢樂个共下生活，長頸鴨還係會擔心自家个身分。有幾下擺佢一個人行來行去，其他个鴨仔看著佢慍悴个樣仔，就問佢。佢同心事講出來過後，這兜鴨仔同佢講，就係因為有佢，正有好分鴨仔家庭恁平安同暢樂个生活。長頸鴨聽著大家人無嫌厥頸根同身分，心肚暢啊蹣等翼，在農場肚走上走下，差毋多會飛起來地。

作者：陳志寧

☆詞彙學習☆

【魚塘】ng^ˇ tong^ˇ：水池。

【鹽酸樹】iam^ˇ son^ˊ su：桑葚樹。

【蒜果樹】son go^ˋ su：蓮霧樹。

【啞啞喊喊】vo^ˋ vo^ˋ hem^ˊ hem^ˊ：吵雜而大聲的叫。

【掙】dui^ˋ：拉扯。